


朱氏家乘

戊子孟夏

高均謹署





姊氏朱母趙夫人家傳

金山高變


姊姓趙氏浙之平湖人年二十二適朱公慰農為繼室朱氏世居江蘇金山之廊下鎮實為金山人而廊下鄰平湖境伊適朱氏之族皆居平湖慰農公遂為平湖邑庠生素席豐厚而儉約自韜晦維姊佐之以賢孝故一家之中和氣常充滿也慰農公元配高氏為我先考秦麓公次女適朱未一年卒當是時余猶未生不及見我姊余所見者即為趙氏姊耳姊自歸慰農公後來我家母我母先節孝李太夫人太夫人愛之無異己女時余年方幼姊則長余二十歲即弟畜余歲時歸甯事先節孝無微不至視弟亦恩意有加焉姊性安祥惻怛生子二人女子子二人余少時每見姊攜其子來悅色溫顏跬步必謹而子皆承順從未聞有疾辭厲聲之達於戶也及二子炳文煥章次第補博士弟子員後數年而慰農公遽即世煥章方病不數日以毀卒

煥章之妻張前數月亦卒二女次字高長適葛氏者更先後歿於家姊念諸艱集於一身乃強抑哀痛手撫煥章所出一孫而教養之其安祥惻怛無異當時之愛其子也姊本好施與至此乃益廓其為善之量凡各地饑荒災賑貧乏無告者求之無不應炳文幼而醇謹及壯乃奮發有為斥貲興學為數至鉅姊每加獎勵不一阻如是者數年而炳文與其婦徐又先後歿遺一子三女姊更並撫之故姊之孫男女五人雖異所出皆不啻同胞也時姊年已六十餘而諸孫皆幼心摧痛甚然仍不以灰其為善之念而抑忍哀思安祥惻怛亦如故間嘗語余諸孫皆無父母教養之責惟在老婦我朱氏累世好善倘天道有知我其能全待諸孫之成立乎時以形家言所居宅不吉因遷避至余家者及五年即延男女師分教諸孫而師皆名德碩學故諸孫皆文行斐然且於此數年中改建居宅突成宏廈更擇地以葬

兩世之樞達十人然後返於里築石梁及六七座又次第為孫  
男女婚嫁者四心力瘁矣後見二孫維坤維垣皆賢且才曾孫  
男女繞膝飴弄老懷乃始安樂歲丁丑之秋姊壽臻八十會國  
難起故鄉亂事大作維坤維垣遂奉以至滬上而姊已病居二  
年遣嫁幼孫女蓋至此而諸孫婚嫁全畢姊當時信之於天冀  
其撫養成立之願無不償矣又月餘至庚辰正月初一日子時  
乃吉祥而逝距生於有清咸豐八年九月初二日享壽八十有  
三

高燮曰此所謂人定勝天者耶吾聞道家之言禍為福基詩曰  
求福不回不回之求不必為福而福終自至此理也惟至人能  
知之今姊以一婦人非有所學乃能信之深而持之篤其平昔  
好善之懷雖蚊蠅之細而無或一傷測怛而慈祥堅忍而積穆  
卒以挽其拂逆愁苦之運而至於極域即求之大聖賢人且猶

難之誠能格天有以也夫



朱母趙太夫人傳

上海朱孔文

丁丑八月淞滬被兵附近居民倉皇避難從子學清移家金山廊下居停朱氏曰維坤者富而好施鄉望歸之余故未識其人也庚辰春有事於上海維坤謁余旅次出其祖母趙太夫人行述屬為傳索太夫人家世年齡伉儷似續及生平行誼具詳高君吹萬所為家傳中余可無論擇其艱苦卓絕有光彤史者著于篇朱氏居金山雄于資而薄于門祚太夫人年未及艾遽喪所天而子若女曰子婦二先後凋謝十年之內迭遭閔凶僅以一嫠婦經紀家政鞠育兩孤孫劬勞垂三十年使維坤兄弟克自振拔不以豐衣足食而墮志氣不以無怙無恃而失依歸修行能文超越流俗太夫人之教也婦人之德莫大乎教子成名陶母歐母古今稱之太夫人教其子廁身庠序不幸早世以教其孫俾底于有成視陶歐母益難矣太夫人之病也尚居故里

海疆多故金山寔重鎮時則有勅旅戍之衆恃以為無恐十月某日遽告失守狼奔豕突境內騷然維坤亟奉太夫人避于鄉俄與學清謀雇舟溯浦而東抵三林塘輾轉而達滬瀆崎嶇百數十里備嘗艱險至是始脫危境而即于安方事急時太夫人處之泰然不改常度蓋天性恬定踐履無虧故能遇險如夷不為利害所動太夫人之言曰生寄死歸余無所恐其所養可知維坤兄弟事太夫人克諧以孝其養生也敬其送死也哀其治喪也豐儉稱財勿之有悔惟以兵事未戢歸葬愆期南望松楸嗥然長慟此誠孝子慈孫所無如何者而戰禍之烈編史乘者可考見一斑焉

論曰余讀晉書孝友傳矚為李密表陳祖母之恩聲淚俱下近世若歸有光張惠言譔先妣事略亦足動人蓋以真性情發而為文無一語溢美自然傳信於後世斯之謂至文維坤所為行



述近之矣存之可以教孝也


輓聯

松江蔡光照

市義愧馮驩感截髮至誠猶幸范逵識母  
渡江傳審理慨陳情終養不同李密辭官

上海黃譜衡


扶病渡江來喜文孫安奉板輿大地龍蛇都讓道  
遊仙隨歲去與王母同傾椒酒瑤池鸞鶴正迎年



輓詩

大埔溫丹銘

矯矯松與柏不受霜雪侵青青女貞木經冬自成林豈惟自成林陰彼蘭桂森桂樹雖早凋蘭花秀江淶蘭枝更分茁羅列如瑤簪助桂溥餘蔭菁莪被澤深鄉里有嘉樹爭就託庇陰卓哉趙夫人婉婉為女箴嬪朱為繼室好合調瑟琴佐夫理家政事姑得歡心歸寧前室母承顏樂且湛大樹遽摧折兩雛教養斟成立掇芹藻比肩歌子衿佳文媿白璧盛業輕黃金奈何先後逝薤露疊淒音撫兒復撫孫一身屯剝臨惟忍乃有濟此義無古今卅載否運過和風與甘霖高齡臻髦耄婺星海上沉吁嗟叔季世斗筭徒自矜負乘嘆致寇治庖訊失飪巾幗有此才惟在德愔愔文孫綴瑣述一字一哀吟再讀熙甫傳千載令人欽



朱母趙太夫人墓誌銘

太倉唐文治

昔孟子論天爵曰樂善不倦夫樂善難矣不倦則尤難易傳言恆雜而不厭雜者處境勞雜而屯艱也屯遭之極而為善之志百折不回此其詣求之士大夫且不易觀况閨閣乎乃今於朱母趙太夫人得之余友金山高君燮其姊適朱氏慰農先生先卒而繼配即趙太夫人高君事之猶姊庚辰孟夏高君持趙太夫人行狀肫肫來請曰吾姊之喪距今數閱月矣將卜葬乞文以銘幽余攷其行歎曰是所謂樂善有恆不倦不厭者耶其可無銘太夫人幼齊莊賢孝年二十二來嬪於朱朱氏世居金山廊下鎮而原籍平湖慰農先生遂遊平邑庠家素封壹處以儉約孳孳為善罔懈太和元氣融融如也每歸甯事高氏節孝李太夫人無異所生性安祥跬步不越禮生子二曰炳文曰煥章俱為博士弟子女二人越數年慰農先生遽櫻疾卒煥章蹙踊

哀痛不數日以毀歿而煥章婦張氏先於前數月卒太夫人既喪所天又痛其子若婦肝腸寸斷矣而主持家政為善益不倦以為古聖善與人同固不敢望而際茲家國多難惟有積善可以長久爰詔其長子炳文斥貲興學為數極巨無所怍炳文善承母志追琢其章成人有德克亢厥宗迺不幸越數載又與其婦相繼歿鄉之人相與歎曰嗟哉善人不獲報竟如是哉太夫人撒涕摧心而為善益不倦緣督孫男女五人勗以讀書勵行恩斯勤斯昕夕閔于斯延男女名教師分別授課於是孫維坤維垣等學成名立文采斐然鄉之人又相與歎曰美哉天之報施善門果不爽哉而太夫人為善益不厭睦婣任恤而外推暨惠澤逮於鄉隅嘗捐建石梁六七座行旅利便有口皆碑而家庭間營葬兩世凡十舊改建居宅攸躋跂翼湜湜其庭蓋承先啓後之規於是益闕而太夫人之心力瘁矣間嘗語其弟燮我

朱氏累世好善倘天道有知我其見諸孫之成立乎已而果然  
蓋其精誠之至通神明貫金石天鑒其衷故有以玉成其志也  
庚辰正月一日以疾卒距生於清咸豐八年九月二日享壽八  
十有三蓋洪範五福基於好德於焉備矣孫維坤維垣將於某  
年某月合葬於某鄉之阡余既敬太夫人之懿行而重違高君  
之請爰為銘曰  
丁繫牛之災祲有星孛如欃槍哀生民之厄運痛嗷雁之悽翔  
繫賢母之慈惠霑涕淚而浪浪有孫枝兮擢秀迎安輿於滬濱  
奉几杖而祇敬舒頤養於天倫胡昊蒼之不弔儵姥峯之西傾  
聿維庚辰月正元日子夜真冷王母降瑤池而來迎眠人間兮  
無憾歸天上兮胡悲溯平生之淑德爰載筆而摛辭埋金山之  
片石與天地以長留願賢子孫之繼志永積善於千秋

金山旅滬同鄉會公祭文

維中華民國二十九年四月七日金山旅滬同鄉會同人謹以

清酌庶饗之奠致祭於 朱母趙太夫人之靈曰

緊維賢母系出望族來嬪於朱閨門肅穆以禮相夫家人輯睦  
勤儉慈祥流風馥郁有子多藝大展鴻猷經商興學決策運籌  
一方利賴渥惠周流唯母之訓鄉黨歌謳中年遭變唯宅凶災  
山莊賃廡秦望之隈閉門養晦腸斷心摧祖孫相守否極泰來  
堂構維新門楣重振行善獲報無徵不信雙鳳鳴枝才高學竣  
荼苦甘回駒光轉瞬丁丑之秋母年八秩國難方殷彌增惴慄  
乃捐壽儀振彼廢疾物與民胞彤史載筆嗚呼海疆不守遍地  
烽煙豕蛇薦食肆毒蔓延避居滬濱庶幾安全九如晉頌長享  
大年胡天不弔厥疾弗瘳金萱遽萎曾不稍留薦傳噩耗桑梓  
同憂陳辭祭告以佐膠羞尚饗

姊氏朱母趙夫人七十壽序

金山高燮

凡人世之福祥壽考其處順安常者往往一遇困阨則悲憫愁苦百事灰冷豈知造物者每視其人之德當摧傷憔悴而不以淡其為善之志則久而久之必當降予厥慶誕登遐齡此不必俟福祉既臻而始知之也但觀其於拂鬱之際能勉自忍抑力肩鉅任而措之有餘裕者識者早有以知其後福之難量而有長生久視之道矣若我姊氏朱母趙夫人有足稱焉夫人浙之平湖人為同邑慰農朱公之繼室慰農公原配高氏我仲姊也仲姊適朱未一年而歿在余誕生前一歲故不及見至卅角時見趙夫人來即知為我姊不知其為他姓姊也自是數十年姊歲時必一至事我嗣母如母我嗣母視之亦不啻己女也朱氏家素封自慰農公更以儉約自韜晦積益厚姊佐之以好施安詳惻怛一家融融然生丈夫子炳文煥章次第補博士弟子員


皆有聲庠序女子子二亦皆賢孝能知禮遠近無不稱羨之者  
逮慰農公以歲己酉二月卒纔十有四日煥章亦卒去其配張  
氏之卒未久也更以二女次字我兄子均長適葛氏者亦先後  
沒於家當是時姊之痛可知也夫以平昔久安娛樂乃不數年  
間變故疊發為人之所難堪而姊於憂愁困苦之中仍持之以  
鎮定撫煥章所出一孫而教養之益廓其為善之量凡各處災  
振暨貧乏無所告者求之無不應時炳文方年壯綽厲奮發捐  
貲興學為數甚鉅姊更獎勉之不之吝也豈知歲丁巳炳文一  
病又沒配徐氏已前沒繼配徐氏閱二年亦沒遺一子三女皆  
幼姊更為手撫之時則姊年已六十餘矣摧折之慘老懷可想  
然姊之含痛而能鎮定也如故聞嘗自念曰使天道有知我老  
婦尚當撫諸孫男女以成立也則益力於為善而勞瘁其躬以  
整飭夫內外者亦更以無倦時以形家言所居宅不吉其避之



便余乃謂姊盍至我家乎姊欣然諾遂留司計者於宅而自攜諸孫來余因割舍之半居之即延男女師分教諸孫讀而師皆名德碩學故五年之中諸孫者遽已文行斐然親戚皆為刮目而姊之撫教諸孫也一如其教子寓嚴正於慈愛故但覺其可戀而未覺其可畏其式於一家也寓明察於寬大於世俗一切樗蒲諸戲屏之惟恐或後故不特諸孫輩不一染即賓客中之嗜此者亦不敢以姊居我家便行之於宅以內也姊雖身居我家然於此數年間擇地以葬兩世之柩達十人築石梁及五六座於宅則改建而聿新之整暇以雍容指揮而若定於是宏宇突起輪奐喬皇而朱氏自數世以來鬱而不宣之氣亦從此昌矣歲甲子之秋江浙亂事作余與姊兩家同避地居滬上者數月迨事平而姊乃歸於里今年正月姊為孫維坤成室而長次二女孫亦以次受聘九月二日為姊七秩設悅之辰先期孫維

坤維垣等咸進而言曰我祖母半生來辛苦悲傷以督教孫輩俾孫輩得有今日祖母之賜於孫輩者真天覆地載莫能盡矣孫等願以祖母誕日邀賓張樂共獻一觴以為老人壽不許則又進而言曰祖母之德宏矣溥矣孫等願徵文於賢豪顯貴以傳示於後世更揚譽於當時庶其可乎亦不許則又進而言曰高氏祖舅為我祖母平生最信重之人且知祖母最諗又夙老于文孫等將丐其一言以娛我祖母而訓孫等矣許之維坤維垣遂退而踵我門以請余曰固也微爾言我亦將削筆而為之矣於是為推本其所以能致福祥壽考之原而敘之如此且有以知姊之慈懷恆德葆其本真定能至八十九而未艾也抑吾嘗讀詩至風雨如晦鷄鳴不已解之者曰亂世則思君子不改其度焉若以一家言則逆運之來皆亂世也能忍抑而無所動者皆不改其度也又讀詩至彼君子女謂之尹吉夫以女而

稱之為君子乃世之所引以為榮若姊者殆真詩人所思之君子也已而余尤有望於維坤維垣者為能無惑於盲談無趨於俗尚本其世德讀書為善俾全其學於亂世以有合於詩人不改其度之義也是亦姊之所以不願得他人言而願得余一言之意也夫



朱母趙太夫人七秩壽言

無錫王蘊章

歲旅彊梧律中無射日月會於壽星之次金山朱母趙太夫人  
春秋七十寶婺一星蔚靈光於坤軸霓裳三疊鏘雅韻於仙家  
於是孔李通家潘楊密戚咸將駁厲淑慎邳張徽柔凱樂以扇  
宗風藏寫而歌難老禮也夫百卉謝馥始堅晚歲之貞萬羽培  
風獨資朝陽之舉鬱之久者後必昌積之厚者人必壽自古有  
徵於今為烈太夫人以當湖甲族儷秦望右宗方其芳猷內敷  
淑質外朗珊瑚半架晨頌椒花翡翠一牀夕唵柳絮固已蘭英  
姓氏藉甚房中香茗詩篇翩然林下年二十二歸贈公慰農先  
生為繼室朱陳一蠲良緣天結趙妃三豨嘉耦曰配時則雙親  
在堂一門鼎盛太夫人抑抑不矜胸胸如畏甘旨修潔尊璋之  
志怡然洮櫛焦勞夫子之情道爾春飈婉婉共伯姊以遵桑秋  
景澄鮮隨諸姑以織素步陸孤姻連戚里克相外庭紇豆陵婚

締強宗無讐內則堂前揖客新成玉糝之羹廚下嘗姑佐以金  
罍之酒無何而家政親摻賢聲益著準儉勤以作壺儀閑謙恕  
而垂庭誥謁鄭修之嫂方視點心過盧諶之家法求曼首長鬚  
便了服其教而不欺媚壻長陵歛以和而自滿朱故方雅之族  
哲嗣長君志賢次公心君幼奉母型早濡陰教勝衣之童已嫻  
揖讓盈尺之壁以鑿詩書陸氏東西之屋花萼同輝何家大小  
之山墳篋競爽盤盤馬困困馬濯龍門畔共知道政之坊鬥鴨  
欄邊爭式浣衣之里人方謂劉綱伉儷未妨盡室登仙許椽全  
家大可閣門學道矣豈知月圓則缺春老難留遜清宣統己酉  
二月二十三日慰農先生遽以末疾捐館舍越月之八日次公  
心君又以哀毀殉父大椿告謝玉樹旋凋松方悅柏中道云殂  
月不舒華上弦先實集兩喪於崇朝萃百哀於彈指雙旌並舉  
動寒風之蕭蕭兩柩克前蔽白日之杲杲謂天蓋高豈云可問

謂地蓋厚胡以靈憂鑿薄影於星河湛浮光於薤露淒其入骨  
東陽無可瘦之膏黯爾銷魂長楚有鷄埋之血此則牛衣之痛  
長揮泪於未亡羊舌之悲更無心於不死者矣終以宗祧之寄  
泣收崩城蘋藻之修壑而持戶指揮家督黽勉女君志賢稟承  
懿徽光大門閭斥家資以育英才評將作而營廣廈懷清之築  
烟若神霄石窳之封榮增棹纒乃甲子初周之歲復邁庚申歷  
劫之辰歲在丁巳志賢不祿弱息雛孫甫離齟齬連番閭阨生  
人之趣何堪予室漂搖崦嵫之境已矣太夫人則茹荼於心伐  
蕙於背邨夫人神明不衰宣文君屏營猶昔魚租雁稅室有常  
供過未封胡門無雜客含飴佐讀中庭之慈竹長春述祖陳情  
龍門之孫枝百尺又復親葬十棺魂安兩世手開三徑茅誅數  
椽佳城鬱鬱卜吉地於暝牛華屋峨峨兆德基於旋馬吳俗輕  
儇千金自奉視為故常一諾濟人意存規避太夫人則餐聖如

歸引仁為質周六親之急拔及金釵拯四舍之貧指空紅朽蓋  
晏如也廓如也慰農先生初娶於高介弟吹萬先生推當代之  
宗工為萬流之淵鏡太夫人情竺孀砧歡逾姜被綠楊買宅春  
好兩家紅杏依林誼同一本即其性情之摯彌徵福報之隆貞  
下起元遇剝而復續中壘之傳昭示今茲紀韋母之禮以風來  
襪紅心草長幸識曹大家於坐中黃菊華開更拜魏夫人於堂  
上



朱太母趙太夫人七秩壽序

平湖陳

翰

側聞敬姜闈門匡季歎以禮湛母封鮚啓陶侃之勳自來婦德  
既惇門祚斯振坤慈所被孫曾聿興是以道備母儀登中壘之  
列傳貞能守業表巴清之築台賢明之風亘古尚已爰有北宮  
孝行撤瑱養親冀妻習勤饋饁相敬崔實母訓子臨政馬明德  
撫孫含飴萃衆善於一身鍾休祥於變世如朱太母趙太夫人  
詢足驗陰行獲報占善裏之克昌循道引年慶慈躬之純嘏者  
已太母為平湖趙春樵先生季女賢孝性成明達有識才超鮑  
妹訓擅班昭年二十有二來歸同邑朱慰農先生牽車挽鹿相  
夫子以恆劬奉輿鳴鷄侍尊章而惟謹旣而熊羆入夢鸞鷲投  
懷樹號三珠佳兒駢轡華如雙璧淑媛連枝太母方勗樂羊以  
斷機誨仲郢而丸膽志賢心君兩文郎並擷芹香宏摘藻采池  
塘春草之夢謝氏新詩玉溪花萼之編李家合集履仁邦屏兩

賢孫馬郎娟好瑜珥瑩懷張子惠聰金篋刮目愛日綿乎累葉  
德星聚於一堂方將翟第增輝笄珈叶韻圖開家慶晒仰橋俯  
梓之光材振國華懋榮室尊朝之典胡乃十載一眴大故迭遭  
讀令嫺祭文痛矣霜凋電碎寫徐淑哀逝黯然明鏡寶釵少子  
以毀瘠而終竟作王戎死孝中郎復早歲不祿堪傷賈傳憂時  
太母集蓼含酸茹荼積苦悵人生之到此恨福善之無徵不知  
堅金之心豈烈焰所能鑠勁松之節非冰霜所可欺太母任艱  
鉅於厥躬瘁瘳持以一臂况復兩世遺襯十棺待葬爰乃隻手  
撐天焦心闢地覃孝婦之諸柩齊舉陳氏女之營墓力劬起夏  
方之墳負土十七載卜吳遠之壟獨葬十三喪加以公姑養送  
之儀子女婚嫁之事孝慈道懋德誼躬操至於散瞻宗媼贏金  
不吝賑給匱乏困粟恆捐輸築路之錢道平若砥鞭造橋之石  
梁亘如虹利在交通樂為傾助尤好裁成翹秀埏埴菁英仲子

志賢君在時慨割私資稟承慈意宏建橫舍廣集生徒煜煜經  
筵悃悃絃誦芝蘭入室蔚儲竹箭之材桃李列門羅拜護幃之  
賜綜厥懿行足召嘉禧題後隆之山密行於以徵顯報號福門  
之子積善所以獲神庥太母以艱苦卓厲之身秉慈惠寬仁之  
德宜其由否而泰去險即夷孫行足以興宗家聲於馬尅嗣聿  
歲柔兆新衡落成營樊重之廬崇開畫閣起王根之第闕闢綠  
墀單闕歲初上元春夜擁華鐙而迎孫婦啓青廬而詠新婚纁  
帛儷皮合登之禮文畢具羹湯洗手重幃之食性能諳茲值桂  
嶺香餘菊天秋爽為太母七秩榮壽之辰坤儀炳曜慈陰恆春  
桃醮承歡寶籙之帙開第八蘭階報喜綵衣之舞奏成雙館甥  
葛君岵瞻翰同研弟也為陳太君行誼屬謨一言將與友壻稱  
醕哥攄三祝竊承授蘭愧無述德之文用勉抽毫敢讓棠仁之  
筆願百歲胡麻飽飫仙傳丹篆長新祝千春菊水甘馨人與黃

華並壽

壽聯

古華祝君堯

龍鱗松室淨授餐賓館愛日親薰菩提善果種心田  
活佛騰歡一笑拈花觀自在  
燕翼錦堂春矜式母儀慈雲庶被蘭玉清芬彌世澤  
壽星朗照千潭印月悟真如




壽序後言

民國二十六年秋王母趙太夫人壽臻八秩會國難作而太夫人亦櫻疾病僅家人團集稱觴祝嘏而已而雲間沈思齊孝廉仍錫以宏文頌揚備至摘辭典雅傳誦當時旋遭板蕩原稿燬焉前歲避寇值思老於滬上思老為我言亂離之中文稿盡佚而此文特長又無從記憶相與咨嗟以為恨事忽忽七年太夫人早棄坤等而思老亦已歸道山回溯前塵曷禁雪涕

中華民國三十七年春維坤謹志

先姑母趙太夫人。為先姑丈朱公慰農之繼配。其元配則先祖考秦麓公之次女也。若論血統。與我高氏。初不相聯。而趙太夫人之事我。先大母也。一如生母。毛裏之親。無以異也。其視我父。一如胞弟。同懷之愛。不是過也。余生也晚。不及見我姑。得見太夫人。自以為我大母之所生也。我姑氏既無出。太夫人有子二人。奮發有為。壯年早世。有女二人。已嫁已字。先後病歿。

太夫人忍痛含悲。順受其正。益擴其為善之念。濟人之心。以挽其厄運。一意撫其孫男女五人。以養以教。至於成立。果也。否極泰來。報施不爽。其孫維坤維垣。善體祖德。文行斐然。孫女三人。咸嬪佳士。曾孫男女。濟濟一堂。於是太夫人願了向平。歸真天上。以庚辰正月朔壽終上海。享年八十有三。嗚呼。此豈常人之所可及哉。先是丁丑九月初二日。實為太夫人八秩誕辰。正值國難發生。人心憤激。維坤兄弟。遵奉慈命。不敢稱觴。當時沈丈思齋。曾撰壽序一篇。備述太夫人茹苦停辛。蔗境回甘之意。迺竟未及書屏。稿亦隨佚。維坤表阮。時用感懷。今以排印朱氏家乘。屬余補白。因記太夫人教育治家之大略。以示世人。知所矜式焉。戊子仲夏侄高君賓敬識



自我繼祖妣趙太夫人之歿小子曾丐太倉唐蔚芝先生為  
銘墓之文世亂蒼黃未暇勒石而太夫人十年旅櫬始於三  
十六年春安葬祖塋自經國難松楸已剪碑碣無存歸視悽  
愴不知所措爰將墓銘及舅祖高吹萬先生等所撰家傳與  
太夫人七十歲時親友所賜壽文并付梓梨冀垂永久坤等  
行能無似貌是流離所以仰體先人之遺旨者曾萬分而不  
得其一循誦斯編兼念遺愛不知涕泗之無從也  
中華民國三十七年仲春孫維坤維垣謹識

中...月...日...  
 其...一...  
 許...  
 夫夫人...  
 謝...  
 十六...  
 餘...  
 自...





先曾祖筵室馬節孝傳略

節孝姓馬氏浙江平湖縣人家世務農年十八歸我先曾王父粹人公為筵室先是曾王母何太淑人棄養曾王父年近六秩遽喪所耦端居寡歡我大父慰農公憂之因請曾大父置筵以侍箕帚曾大父初不許曰年老納妾徒滋身後之累不可為也後家人環勸曾大父始有允意惟言必須有來自田間質樸無華者或庶幾乎審之又審於是始得馬節孝而納焉自節孝來歸後布裳整肅紡織維勤未嘗游讌一家之內亦融洩無間曾王父引為大慰乃纔及二歲曾王父即捐館舍病亟遺命馬氏年輕又未有所出終恐不能苦守吾死宜斥資遣歸也節孝聞言大慟曰我雖生鄉農家亦習聞忠孝節義之說矣主君如不諱而我頓違素志其何以立於天高地厚之間乎言已截髮叩天割肌斷食家人繞而慰之始進裹食居喪哀毀里黨稱之後

值我家多故喪亂頻仍而節孝佐理先王母趙太淑人茹苦含辛  
辛摯持家政五十餘年未嘗怠忽故我家在顛連艱苦之中猶  
克維繫不墮者雖我先王母之功高澤厚而節孝亦與有力焉  
民國廿三年夏往平湖戚家忽中暑感疾昏迷不醒其家遣急  
足來告維坤等星夜遄奔泊抵平湖已不及見時天酷熱節孝  
體本肥胖又未嘗一日斷飲食越日而殮面目如生肌膚冰潔  
無所變羣以為異僉謂節孝冰霜勵節所致云又越日歸喪時  
先大母年亦七十餘矣兩鬢皤然哭泣盡禮人皆稱先大母之  
至性過人然亦由於節孝之賢而知禮克完大節尤能感人之  
深也今距節孝之沒已八年十一月某日為冥壽八秩因追念  
節孝之苦節懿行尚未請邀國褒今邑中方有修志之舉用敢  
述其大略以備采擇坤生也晚不能悉其詳云中華民國三十  
一年嫡曾孫朱維坤謹述

